

M028: Balaam, Vorauer (Bücher Mosis 5)

0,1 wîlent was ein rîcher man .
0,2 Balach was der sîn name .
0,3 in sîn lant er varn sach .
0,4 michel here daz was ime ungemach .
0,5 di juden mit grôzer menige .
0,6 er îlte sich besenden .
0,7 ze allen sînen holden .
0,8 sîn muot was in erbolgen .
0,9 sunderbar er dô ladete .
0,10 einen wîssagen in sîneme lande den er habete .
0,11 er bôt ime schatzes sô vile .
0,12 ob er komen wolte zuo ime .
0,13 unde daz er vervluochete .
0,14 di got selbe leite joch beruochte .
0,15 unde von des vluoches segene .
0,16 unsigehafte wurde diu gotes menige .
0,17 gesigen mohte er denne desten baz .
0,18 den wîssagen besante er umbe daz .
0,19 er gehiez ime schatzes genuoge .
0,20 ob er ime mit râte ze helfe kome .
0,21 der schatz der was deme wîssagen liep .
0,22 er ne zwîvelete niht .
0,23 diu girede in erblante .
0,24 daz reht gotes er ne erkante .
0,25 er tet vile unrehte .
0,26 wider got wolte er vehten .
0,27 durch des schatzes minne .
0,28 daz wâren unsinne .
0,29 ûf sînen esel er dô saz .
0,30 daz ime zogete desten baz .
0,31 er ne wolte niht bîten .
0,32 ze hove wolte er rîten .
0,33 er ne wolte ervûllen .
0,34 des kûninges muotwillen .
0,35 [wan] durch sîn silber unde durch sîn golt .
0,36 sîner armen eselinnen was er dô boreholt .
0,37 dô der selbe guote man .
0,38 verre ûz an daz velt quam .

0,39 an eines weges enge .
0,40 der engel kom ime engegene .
0,41 ein swert an sîner hant er truoc .
0,42 an den wec – vüre den esel er gestuont .
0,43 vürhten begunde ime daz selbe vihe .
0,44 der man ne mahte in gesehen .
0,45 vile vaste der esel stuont in stete .
0,46 sîn meister ime vile wê tete .
0,47 er hiew in vaste mit beiden sporen .
0,48 zuo deme esele was ime sô zorn .
0,49 mit der geiselen er in vaste sluoc .
0,50 der in dâ vore ofte truoc .
0,51 der meister was ime beheit .
0,52 vürebaz ne mohte er komen niht .
0,53 wande ime den wec werete .
0,54 der bote den got dare gesendet habete .
0,55 der esel habete grôze nôt .
0,56 vore ime sach er den krimmigen tôt .
0,57 allenthalben umbe sich .
0,58 daz was harte sorgelich .
0,59 zwêne sporen vile vrech .
0,60 di vâhten in daz sîn verch .
0,61 rügge unde rippe .
0,62 dwanc diu geisele nôt was daz diu dritte .
0,63 der arme suochente von nôt wankete er enein .
0,64 sînem meister harte brach er daz bein .
0,65 an eineme steine bî deme wege .
0,66 daz ne wart dem armen niht vergeben .
0,67 der unsinnige man .
0,68 stecken zwêne grôze er gewan .
0,69 über den esel er gestuont .
0,70 mit beiden handen er in sluoc .
0,71 vaste an diu rippe .
0,72 hinden unde enmitten .
0,73 vorne er in vaste blou .
0,74 wande in sîn bein harte rou .
0,75 nû müget ir hoeren wunder .
0,76 an den buochen ist iz vunden .
0,77 der esel begunde sprechen sô sîn man .
0,78 êr noch sint daz nieman vernam .
0,79 er begunde ruofen lûte .
0,80 unde sprach “meister waz wîzest dû mir hiute .
0,81 wie ist dir hiute sus geschehen .
0,82 wole dû weist ich was ie dîn undertânez vihe
0,83 mit willen ich dich ie truoc .
0,84 dû wære mir liep ich was dir guot .
0,85 ich was dir ie gehôrsam .
0,86 vile nû hâst dû mir getân .

0,87 âne schulde ist ez mir geschehen .
0,88 vore mir hier hân ich gesehen .
0,89 stên einen vile starken man .
0,90 vüre mich gên ich niht getar .
0,91 der hât an sîner zeswen hant .
0,92 ein swert parz
0,93 durch den tet ich den wanc .
0,94 dô dû dich stieze .
0,95 des lâ dû mich geniezen .”
0,96 deme heidenischen wîssagen .
0,97 deme wurden sîniu ougen ûf getân .
0,98 den engel von den himelen .
0,99 sach der man hier nidene .
0,100 mit eineme barn swerte .
0,101 den mahte er vürhten harte .
0,102 den vluoch verbôt er ime überlût .
0,103 über daz here unde über daz liebe gotes liut .
0,104 der gire man dô vernam .
0,105 wie diu sache was getân .
0,106 dô kêrte dô der tumbe .
0,107 den sînen esel umbe .
0,108 ez was ein lasterlîchez leit .
0,109 einen anderen wec er umbereit .
0,110 durch des schatzes liebe .
0,111 ze hove kêrte er schiere .
0,112 waz half in aber daz .
0,113 gegebenet ne wart ime niht desten baz .
0,114 wande er ne mohte erfüllen .
0,115 des küniges muotwillen .
0,115a – – –
0,116 diu zunge in deme munde .
0,117 diu wart ime gebunden .
0,118 daz er ne mahte vluochen .
0,119 den der got selbe wolte ruochen .
0,120 den giren übelen willen sîn .
0,121 den gebant got der gewalt was sîn .
0,122 doch gap er deme künige einen übelen rât .
0,123 in exodo der geschriben stât .
0,124 er besweich si mit den wîben .
0,125 daz wart ze banne manigen lîben .
0,126 diu râche sîne ez gestillte den gotes zorn .
0,127 des wîssagen karger rât unde gebe des küniges die wâren gare verloren .
0,128 Balaam der wîse man .
0,129 ûf einen berc er kom .
0,130 bî deme künige er gestuont .
0,131 diu wort er wandelete unde niht daz muot .
0,132 er sach nider an daz velt .
0,133 gedenet hæte sîn gezelt .

0,134 daz guote israhêlische here .
0,135 gevarn was ez durch daz rôte mere .
0,136 mit grôzliche volke .
0,137 als ez got wolte .
0,138 zweliv schare breite .
0,139 Moyses di leite .
0,140 von den zweliv patriarchis .
0,141 geboren wâren si daz ist gewis .
0,142 von zweliv Jakobes kinden .
0,143 zuo sus getânen dingen .
0,144 in allen namen hiez er Judas .
0,145 der Jakobes sun der êrste was .
0,146 der andere hiez Ruben .
0,147 an dirre zale sol er stên .
0,148 dâ nâch stêt Neptalim .
0,149 der dritte mac er wole sîn .
0,150 nû vernemet lieben mêr .
0,151 der vierde heizet Manasse .
0,152 der vünfte heizet aber Gat .
0,153 der sehste Aser swâ er stât .
0,154 der sibende heizet Simeon .
0,155 den zehenden nennet man Zabulon .
0,156 dâ enzwischen daz ist wâr .
0,157 stêt Levi unde Isachar .
0,158 der zwelifte heizet Benjamin .
0,159 Josepch stât dâ vore geschriben .
0,160 di wâren der aller kristene stam .
0,161 von den daz selbe liut kom .
0,162 juden schare breite .
0,163 Naason die leite .
0,164 dâ nâch schare Isachar .
0,165 di vuorte Tanael daz – ist wâr .
0,166 diu edelen kint Zabulon .
0,167 der di berihte der hiez Elon .
0,168 di drî schare genôze .
0,169 hæten menige grôze .
0,170 si habeten an daz selbe velt .
0,171 ûf geslagen manic gezelt .
0,172 ôstenân zesamene .
0,173 mit bîzicliche magene .
0,174 si ne hæten vorhte nechein .
0,175 wante [in] in den himel zogete alterseine .
0,176 sundenân ouch diu lâgen .
0,177 di dâ des heres pflâgen .
0,178 drî snelle helede .
0,179 mit burcmæzen seledē .
0,180 Eleusur der guote .
0,181 kint Rubenes er behuote .

0,182 Samiel der alte .
0,183 Simeones schare er waltete .
0,184 Gat der hæte krefte manigen .
0,185 Eleasapch sol si wole bewaren .
0,186 di drî snelle degene .
0,187 di bewarten dâ di menige .
0,188 von aller slahte noete .
0,189 mit rehte jouch mit güete .
0,190 nû vernemet wole daz mân wort .
0,191 des veldes westerez ort .
0,192 daz besaz Elisamâr .
0,193 Ephraimes künne hæte er dâ .
0,194 Gamaliel ime eneben .
0,195 Manasse der was ime ergeben .
0,196 mit zwein saz Abidan .
0,197 von den buochen wir daz hân .
0,198 vürste was er Benjamin .
0,199 vone gote hæte er guoten sin .
0,200 dâ mite bewarte er sîn teil .
0,201 vile guote was daz ire heil .
0,202 vore den an der sîten .
0,203 Dan lac dâ wîten .
0,204 Abiezar des heres pflac .
0,205 daz ist wâr sô der tac .
0,206 Phegiel der pflēgete .
0,207 di Aser geboren habete .
0,208 dâ nâch rihte aber sâ .
0,209 Neptalim Abira .
0,210 mit micheleme sinne .
0,211 di niuwen komelinge .
0,212 mit starkeme rehte .
0,213 di tiuren gotes knehte .
0,214 zuo aller slahte güete .
0,215 âne übermüete .
0,216 in mitten dirre menige .
0,217 sô was grôz gesemedē .
0,218 di hiezen leviten .
0,219 alsus sagete uns diu ê .
0,220 di der arke pflâgen .
0,221 swâ sô si wâren .
0,222 unde si vüre truogen .
0,223 swâ si hine vuoren .
0,224 dâ inne was bestetenet .
0,225 manna himelbrôt .
0,226 mit deme got vone himele .
0,227 di sîne satete hier nidene .
0,228 daz was sam diu semele .
0,229 diu gebachen ist mit deme honige .

0,230 ir iegelîcher dâr ane nam .
0,231 als ez sîn giredede wolte haben .
0,232 sûeze oder sûre .
0,233 genuoge oder tiure .
0,234 ein sâme heizet coriandron .
0,235 gelîch ist er lînbollen .
0,236 bî diu mûgen wir erkennen .
0,237 manna daz wir nennen .
0,238 swanne ez juden âzen .
0,239 daz tâten si mit mâze .
0,240 iegelîcher ze eines tages vrist .
0,241 nâmen ein gomor sô ez geschriben ist .
0,242 sô hiez der selbe metze .
0,243 der dâ zuo was gesetzet .
0,244 zwêne an deme sechsten tage .
0,245 den einen an deme sibenden si solten haben .
0,246 swer sich sîn mêr underwant .
0,247 der ne vant des morgenes niht an der hant .
0,248 swaz sîn wart ze leibe .
0,249 daz wurden wûrme kleine .
0,250 daz bezeichnenet dich Krist hêrre got .
0,251 dû von dîner muoter nâme vleisch unde bluot .
0,252 von ire sûezeme lûtereme wîzeme lîchnamen .
0,253 âne alle werltlîchen manne .
0,254 siu ist der ellenden trôst .
0,255 gehûgede der gotes wunder alsô grôz .
0,256 unserre arke ist si heilictuom .
0,257 wir haben ire êre grôze unde ruom .
0,258 diu arke habete mêre .
0,259 samelîcher êre .
0,260 der zweliv gerte eine .
0,261 nû vernemet ouch waz diu meine .
0,262 Moyses was ein wîse man .
0,263 in gotes gezelt hiez er tragen .
0,264 von geslehte . gelîch .
0,265 eine gerte sunderlich .
0,266 er hiez si dâr in stechen .
0,267 prûeven unde merken .
0,268 der heilige man .
0,269 got biten er began .
0,270 daz er ûf tæte .
0,271 wen er erwelt hæte .
0,272 under in allen ze êren .
0,273 ime selben ze eineme vorderen .
0,274 er wesse in gewaltic .
0,275 guoten unde mehtic .
0,276 eines zeichenes er dô gerte .
0,277 got in des gewerte .

0,278 des anderen tages in morgene .
0,279 daz zeichen was unverborgen .
0,280 di einlive durre wâren .
0,281 saffes si ne pflâgen .
0,282 diu zwelifte diu Aarones was .
0,283 di sach man grüene sam ein gras .
0,284 loubîn bluomen schiere .
0,285 mandelen gebar si ziere .
0,286 den tiuren edelen wuocher .
0,287 daz haben wir von den buochen .
0,288 der hêrre sich dô vröuwete .
0,289 des er gesehen habete .
0,290 wande ime kunt was worden
0,291 daz dâ vore was verborgen .
0,292 daz ein meit gebære .
0,293 under welicheme geslehte ouch daz wære .
0,294 diu gerte bezeichnenet unser vrouwen .
0,295 der wuocher Kristen ire einborenen sun .
0,296 gezierde ist si der arken .
0,297 wir mügen ir unsich troesten starke .
0,298 dâr inne was ouch mêre .
0,299 daz traf ze guoter lêre .
0,300 ein tavele diu was steinîn .
0,301 Moyses hiez si legen dâr in
0,302 gegeben habete si ime got .
0,303 geschriben wâren dâr ane zehen gebot .
0,304 daz was diu alte lêre .
0,305 den juden ze einer lêre .
0,306 ob si siu wole behielten .
0,307 des rîches si allez willeten .
0,308 iegelîcher ouch entvienge .
0,309 dâ nâch den lîp der niht zergienge .
0,310 daz was daz dritte heilictuom .
0,311 danne hiez diu arke propitiatorium .
0,312 über dise selbe heilicheit .
0,313 sô was ein gezelt vile breit .
0,314 gedenet mit den snüren .
0,315 von umbehangen tiuren .
0,316 kurrûn daz rôte .
0,317 daz was getân ze huote .
0,318 obene an deme dache .
0,319 von hiuten hiez man ez machen .
0,320 di siule dâr inne .
0,321 di lûhten same diu gimme .
0,322 geworht wâren si mit vlîze .
0,323 golt zierte si jouch silber daz wizze .
0,324 dâr inne stuont ein kerzestal .
0,325 licht gap ez deme gezelte überal .

0,326 ze wære sagen ich ez iu .
0,327 der vuoꝝ geteilet was ime in driu .
0,328 ein schaft obene dâr ûz gie .
0,329 dâr nâch in sibeniu er si entvie .
0,330 necheines mannes ougen .
0,331 di ne mahten nie beschouwen .
0,332 necheinez sô spæhe noch sô guot .
0,333 der vröuwete sich der êwarten muot .
0,334 ze wære des pflige ich mich .
0,335 daz was allez bezeichnenlich .
0,336 daz kerzestal ze wære .
0,337 daz was geworht spæhe .
0,338 von al rôteme golde .
0,339 Moyses hæte di smide holde .
0,340 Beselehel unde Ooliap .
0,341 di worhten ez sô ez geschriben stât .
0,342 mit wîsetiefen sinnen .
0,343 ze êren gote jouch ze minnen .
0,344 mit gesmelze joch mit wieren .
0,345 mit bezeichnenlîchen êren .
0,346 obenân habete ez sibene stabe .
0,347 spêrelen stecketen dâr ane .
0,348 sinewel gedrâte .
0,349 dâ nâch kôpfe ez hête .
0,350 an aller schefte gelîch .
0,351 sô wâren ir drî bevollen êrlich .
0,352 ir sehet ouch dâ lilium .
0,353 geworht vone golde bluomen .
0,354 wir ne mügen ez niht verdagen .
0,355 ein lützel schulen wir hinnen sagen .
0,356 bezeichenunge waz hier ane sî .
0,357 der vuoꝝ uns ouget namen drî .
0,358 in einer wesenunge .
0,359 hier bedorften wir offenunge .
0,360 got vater ist der eine .
0,361 von ime der sun ungescheiden .
0,362 nû nennen wir den dritten sus .
0,363 von rehte er heizet spiritus sanctus .
0,364 wande er ist ir beider minne .
0,365 werc wirkendez zuo allen dingen .
0,366 diu selbe trinitas .
0,367 diu ist ein einigiu unitas .
0,368 alter noch zît bevæhet ir nechein .
0,369 mêrer noch minner ist ouch ir nechein .
0,370 ûf stêt si in einen schaft .
0,371 hât ez diu geloube sinnes wirdet ez wole berehaft .
0,372 in sibeniu teilet si sich obenân .
0,373 des geistes gebe sint daz sô wir ez hân .

0,374 doch man si merke misseliche .
0,375 uns trenkent dâ drî köpfe bevollen êrliche .
0,376 der drîvaltigen geloube .
0,377 diu labet uns des herzen ougen .
0,378 in einer einicheite .
0,379 dar sol uns der gedinge mit der minne leiten .
0,380 der gotes gebe trunkenheit .
0,381 diu wile uns verlâzen der werlte leit .
0,382 daz wir ne gern anders niht .
0,383 newær daz êwige licht .
0,384 si wile daz wir vergezzen .
0,385 daz trinken jouch daz ezzen .
0,386 unsere künnelinge .
0,387 mit aller slahte dingen .
0,388 durch daz himelrîche .
0,389 si heizet uns in geswîchen .
0,390 zehenzicvaltîc wirdet daz unser lôn .
0,391 noch ne wizzen wir des wir her nâch werden vrô .
0,392 der kopf ist nû bedecket .
0,393 daz trinken wole smecket .
0,394 dâ nâch wehset lilium .
0,395 daz sint wîze bluomen .
0,396 daz sint unschulde .
0,397 di gebent uns gotes hulde .
0,398 unser gesmac wirdet ruofe unde breit .
0,399 daz ist guot liumunt lât iu niht wesen leit .
0,400 der minne .
0,401 zuo samelîchen dingen .
0,402 verre unde nâhen .
0,403 beginnent manige gâhen .
0,404 daz si gewinnen disen smac .
0,405 sô ist diu lilje berehaft .
0,406 manigiu wellet si in ein .
0,407 sam zerbrochenez bein .
0,408 daz sint gotes êre .
0,409 nû gên wir vûre mêre .
0,410 di smide unverdrozzen .
0,411 hæten dâ bî gegozzen .
0,412 sinewelle sphaerulas .
0,413 daz bezeichnenete daz .
0,414 daz wir wæren gerne .
0,415 durhnehte sam unser hêre .
0,416 unde uns niht betwûnge .
0,417 nechein bekorunge .
0,418 noch ze harte niht verleitte .
0,419 der werlt wirdicheite .
0,420 noch vramspuote niemannes gemüete .
0,421 erhebe niht über daz reht .

0,423 der ist ouch ein schirmunge .
0,424 der gotes zimberunge .
0,425 durch die sîne güete .
0,426 in aller ire noete .
0,427 hier ûfe liuhtent nû diu licht .
0,428 diu en erleschent uns niht .
0,429 daz sage ich iu ze wâre .
0,430 daz sint die lêre .
0,431 si bereitent ir zuo mannen unde zuo wîben .
0,432 daz si den wec mûgen hân .
0,433 di in die pfalnze wellent gân .
0,434 nâch des wirtes êre .
0,435 daz ist got unser hêrre .
0,436 nû sehet ir daz kerzestal .
0,437 nû lâzen wir die rede stân .
0,438 von disen selben dingen .
0,439 sînen magen müget ir vinden .
0,440 ob ir in wellet suochen .
0,441 geschriben an den buochen .
0,442 ich en sage iu niht mêre .
0,443 hier tuon ich widerkêre .
0,444 lange twâle hân ich getân .
0,445 nû sprechet alle daz ist wâr .
0,446 diu gezelte dô Balaam gesach .
0,447 vile harte innericliche er sprach .
0,448 “jungestiu zît mîniu .
0,449 werde gelîch disen hêrren .”
0,450 niene pflac er vluoches .
0,451 er begunde in wûnschen guotes .